

Plaza principal di Linear Park lo honra nos baluartenan di turismo

E lo haya e nomber Plaza Turismo

E Linear Park lo ta un parke di multiple uso.

Gobierno a tuma e decision cu e plaza dilanti Talk of the Town lo haya e nomber Plaza Turismo oficialmente, caminda ta bay duna reconocimiento na e baluarte y pioneronan den e area di turismo.

Banda di esaki e lo bira un reaccion enorme pa nos propio hendenan na promer lugar, lo bay

tin kioskonan, stoelnan, parasolnan entre otro pa nos hendenan por sinta na cualkier ora di dia y bin cu nan famia pa pasa un rato agradabel.

Lo bay tin un caminda di bicicleta y un caminda pa hendenan cana separa pa hendenan por haci ehercicio.

Intencion ta pa den futuro riba e Linear Park lo tin sites pa tur hende cu ta bishita e parke linear por tin

wi-fi, ya caba tin conversacionnan andando cu Setar pa por logre.

Pa Minister Otmar Oduber esaki ta crea un otro ambiente tambe caminda hoben y adulto por bay y subi online.

Paralelo na dje ta bin tambe cu un idea innovativo pa nos turismo, caminda cu for di Plaza Turismo turistanan lo por comunica cu nan famia pa 10-15 seconde y contanan con nan ta pasando na

Aruba.

E promer fase ta core for di rondede Las Americas te na cas di Gobernador.

E siguiente fase cu lo wordo traha riba dje na e momento aki ta bou deliberacion entre Ministernan Otmar Oduber y Benny Sevinger.

Ta spera cu den e siman nos dilanti lo por tin un decision caba riba dje, esta si ta cuminsa for di aeropuerto te na Cas di Cultura, of si ta cuminsa cu e parti pabou di Wilhelmina Park te na ex- edificio di DOW.

Una bes e partinan aki keda cla, cual ta e partinan mas dificil, unda cu por encontra mas retonan, e resto, dilanti hotelnan lo bay hopi

mas facil, pasobra tin un desaroyo hopi mas amplio eyan. Minister Oduber ta calcula cu lo tin alrededor di 7 pa 8 fase pa por finaliza e Linear Park completamente.

E promer fase tin un costo di 4.9 miyon florin, y posiblemente e di dos y di tres fase lo tin un costo rond di e mesun suma, e demas fasenan ta wordo calcula cu lo ta hopi menos, alrededor di 2 miyon florin.

Asina por bisa cu ta trata di un proyecto cu lo ta rond di 40 pa 50 miyon una bes cu e ta completamente cla, convirtiendo su mes den e parke mas largo den Caribe cu un total di 10 miya.